

Sveio kommune

Bømlo, 16. november 2020

## **SØKNAD OM MIDLERTIDIG DISPENSASJON – AKVAKULTURLOKALITETEN LODDETÅ**

Bremnes Seashore driv lokaliteten Loddetå ved utløpet av Ålfjorden i Sveio kommune. Lokaliteten består av fire merdar i fortøyingsrammer. Maksimalt tillaten biomasse for lokaliteten er 2 340 tonn.


Det er kome for ein dag at anlegget sin fysiske plassering ikkje fullt ut er i tråd med godkjent område for akvakultur i kommuneplanen. Lokaliteten Loddetå ligg med ein annan vinkel frå kystkonturen enn gjeldande løyve, som vist i illustrasjon 1.

Lokaliteten har vore plassert slik sidan 2008. Det er uheldig at denne situasjonen har oppstått, og me ønskjer med dette å avklara arealsituasjonen for lokaliteten.

Sveio kommune arbeider for tida med kommuneplanen sin arealdel. Bremnes Seashore har i samband med dette kome med framlegg til endring i arealføremålet ved lokaliteten. Dagens fysiske plassering av Loddetå er i tråd med arealinnspelet til kommuneplanen. Dersom kommunen gjer vedtak i tråd med vårt innspel, vil det difor ikkje vera naudsynt å flytta anlegget.

**Bremnes Seashore søker med dette om midlertidig dispensasjon frå gjeldande kommuneplan fram til ny kommuneplan er vedteken.**

Lokaliteten ligg på eit område med djupne på om lag 260-300 meter og har gode driftstilhøve. Straumretninga er i hovudsak mot sør. Bremnes Seashore gjennomfører jamlege undersøkingar av recipient. Siste undersøking, frå mai i år, gav beste tilstandsklasse.




Illustrasjon 1: lokalitetsplassering og vedteke areal i kommuneplanen. Kjelde: Kystverket

### Plansituasjon

Kommuneplanen nyttar arealføremåla akvakultur (A) og fiske-, ferdsel-, natur-, frilufts- og akvakulturområde (FFNFA). Føresegnene § 6.1.5 gir at akvakulturområda (A) omfattar godkjente lokalitetar for fiske-, skaldyr- og skjeloppdrett. Områda omfattar areal for oppankrings- og fortøyingsanlegg over sjøoverflata og ferdselsforbodssone. Lokaliseringa av oppdrettsanlegg bør ikkje skje nær badeplassar og tett opp til heilårs- og fritidsbustader. Etter føresegn 6.1.7 omfattar FFNFA-områda område for oppankrings- og fortøyingsanlegg til oppdrettsanlegg, under sjøoverflata, og forbodssone for fiske.

Akvakulturanlegget ligg delvis i einbruksområdet A, og strekk seg noko ut i fleirbruksområdet FFNFA.



Illustrasjon 2: Utsnitt av kommuneplanen. Kjelde: Sveio kommune

#### **Andre omsyn**

Det ligg ingen hovudfarleier i nærleiken av lokaliteten. Bileia Ålfjorden ligg mot aust. Fortøyningane til oppdrettsanlegg startar i vassoverflata og går med varierande helling ned til sjøbotnen for feste. Ei sone på 20 meter målt frå anlegget sine ytre rammer i vassoverflata er forbodssone for ferdslle etter akvakulturdriftsforskrifta § 18. Utanfor denne sona er fortøyningane ikkje til hinder for ferdslle. Akvakulturanlegg har krav om tydeleg merking med blinkande lys. Ved dispensasjonsvedtak vil anlegget liggja marginalt lenger ut i fjorden, utan at det vil få følgjer for skipstrafikken.

Det er registrert eit automatisk freda kulturminne under vatn sørvest for lokaliteten, eit skipsfunn inne mot land. Dispensasjonssøknaden vil ikkje påverka kulturminnet.

Det er ingen registrerte verneområde eller korallrev i nærleiken av lokaliteten. Fugleartane ærfugl og gråspett er registrert ved kystlinna sørvest for lokaliteten, medan makrell og kolmule er registrert sør for lokaliteten. Dispensasjonen vil ikkje påverka artane høvesvis godkjent plassering.

Landsida vest for lokaliteten er del av det store friluftsområdet Trollavassnipen/Målefjellet, som er sett til å vera svært viktig. I underkant av 600 meter nord for lokaliteten ligg det statleg sikra friluftsområdet Holsvika, som er vurdert til å vera svært viktig. Friluftsområdet Holsvika ligg langt vekke frå lokaliteten, og Holsvikneset skjermar badestranda frå lokalitetsarealet. Dispensasjonen påverkar ikkje høvet til sjøvegs friluftsliv, som padling eller småbåttrafikk. Dispensasjonen vil ikkje gje endra påverknad på friluftsliv.

Etter akvakulturdriftsforskrifta § 18 er det forbod mot fiske i ei sone på 100 meter, målt frå anlegget sine ytre rammer i vassoverflata. Akvakulturførtøyinger avgrensar i tillegg høvet til nokre formar for fiske med aktive og passive reiskap som kan festa seg i førtøyingane eller anker og festeboltar. Akvakulturområdet er del av dei større fiskeplassane for passive reiskap Søra-Årvikneset-IIholmane (yrkesfiske etter breiflabb) og Ålfjorden/Sveio aust (fritidsfiske etter sei, lir, hyse og krabbe). Fiskeplassane blir i følgje registreringa i mindre grad brukt i dag. Aust for lokaliteten ligg rekefeltet Tittelsnes/Klosterfjorden, som etter registreringa er mest brukt av reketrålarar frå Bømlo og Kvinnherad. Dispensasjonen vil i svært liten grad påverka høvet for fiske ved lokaliteten. Dei registrerte fiskeplassane ved og nære lokaliteten er store, og dispensasjonen vil ikkje gje påverknad på fiskeriomsyn.

Lokaliteten sin vinkel gjer at noko av arealet ligg utanfor akvakulturområdet, og kjem inn i fleirbruksområdet som inkluderer tiltak knytt til akvakultur. Området er difor overordna avsett til akvakultur.

### Krav til dispensasjon

Plan- og bygningslova § 19-2 andre ledd stiller to vilkår for å gje dispensasjon. For det første må ikkje omsyna bak føresegna det blir dispensert frå, eller omsyna i lova sine føremål, bli vesentleg sett til side. For det andre må føremonane ved å gje dispensasjon vera klart større enn ulempene. Sidan søknaden er for ei avgrensa tidsperiode og er fullt ut reversibel, vil påverknaden til andre omsyn få lågare vekt.

Arealføremålet FFFNFA skal sikra tilhøva for ferdslle og farleier, fiske, friluftsomsyn, og ta vare på naturverdiane i sjøområdet. Området opnar også for tiltak knytt til akvakultur. Som skildra i søknaden vil ikkje dispensasjonen setja omsyna vesentleg til side.

Den viktigaste føremonen med dispensasjonen er at drifta ved lokaliteten kan halda fram i påvente av vedtak av kommuneplanen. Ei flytting av lokaliteten for eit kortsiktig tidsrom påverkar produksjonsplanlegginga til selskapet, og kan redusera matproduksjonen i perioden. Regjeringa har sett mål om auka sjømatproduksjon. Flytting vil i tillegg vera eit svært dyrt tiltak.

Det gir difor ein stor og betydeleg føremon å venta på vedtak av kommuneplanen. Ei mogleg ulempe ved dispensasjonen er at forbodssona for fiske og ferdsel kjem ubetydeleg lenger utover i fjorden. Bremnes Seashore meiner difor at føremonane ved å gje dispensasjonane er klart større enn ulempene.

Med venleg helsing  
Bremnes Seashore AS

Geir Magne Knutsen  
fagsjef strategi og utvikling

Andreas Moe Larsen  
prosjektleiar

Kopi til:  
Fiskeridirektoratet  
Vestland fylkeskommune